



Aningaasaqarnermut Akileraartarnermullu Ataatsimiititaliaq

Maani

UKA2023/19 ataatsimiititaliamut akissut

Aningaasaqarnermut Akileraartarnermullu Ataatsimiititaliaq ullumi Nioqqutissanik eqqussuineq annissuinerlu pillugit Inatsisartut inatsisaata allanngortinnera pillugu Inatsisartut inatsisissaattut siunnersuummut apeqqtinik sisamanik kingusinnerpaamik ulloq 6. november 2023 akineqartussanik apeqquteqarpoq.

Brevdato: 06-11-2023
Sagsnr.
Akt id. 23583141

P. O. Box 1037
3900 Nuuk
Tel. (+299) 34 50 00
Fax (+299) 34 63 50
E-mail: oed@nanoq.gl
www.naalakkersuisut.gl

Akissut piffissamik sivikitsumik periarfissaqarluni suliarineqarpoq.

Apeqqut 1

Nioqqutissanik aalakoornartortalinnik nammineq atugassanik eqqussinermi aammalu nammineq piumassutsimik akitsuusiisitsinermi sullissinermut akiliisitsissummik atuutilersitsinissaq Naalakkersuisunit kissaatigineqarpoq. Tassunga atatillugu ataatsimiititaliamit maluginiarneqarpoq nioqqutissanik aalakoornartortalinnik nammineq atugassanik eqqussinermi sullissinermut akiliisitsissut 250 kr.-inut aalajangersarneqartoq, namminerli piumassutsimik akitsuusiisitsinermi sullissinermut akiliisitsissutissap aningaasartassaa aalajangersarneqarsimanani. Tassunga atatillugu siunnersuummut nalinginnaasumik nassuiaatini qupperneq 11 innersuussutigineqarpoq, tassani paasissutissiissutigineqarpoq sullissinermut akiliisitsissut Naalakkersuisunit aalajangersarneqassasoq.

Tamatumani nammineq piumassutsimik akitsuusiisitsinermi sullissinermut akiliisitsissutissaq sooq aalajangersarneqareersimannginnersoq aammalu akiliisitsissutissaq taanna qanoq annertussusilerlugu aalajangersarneqartussatut Naalakkersuisunit naatsorsuutigineqarnersoq paasissutissiissutigineqassasoq ataatsimiititaliamit kissaatigineqarpoq. Tamatumunnga Naalakkersuisut oqaaseqaateqarnissaat ataatsimiititaliamit kissaatigineqarpoq.

Akissut

Nammineq eqqussinermi sullissinermut akiliut inatsisip oqaasertaani aalajangersarneqarnissaanik siunnersuuteqarneq, akiliutip annertussusaanik ersarissuutitsinissamik kissaateqarneq patsisaavoq.

Taamaalilluni aallaqqaammut akiliutip annertussusaa qularnaarneqarpoq, tamannalu aaqqissuussinermik atuinissamik kissaateqartunut Akileraartarnermullu Aqutsisoqarfimmu iluaqutissiivoq. Tamatuma saniatigut inatsisikkut aalajangersaanikkut akiliutip Akileraaruserinermik Aqutsisoqarfiup sulianik taakkunanga passussinermut aningaasartuutaannit annertunerunanik nalornisoqarsinnaajunnaarsitsivoq. Akiliutip Akileraartarnermut Aqutsisoqarfiup aningaasartuutaannit annertuneruppat, pisut apeqqutaatillugit akiliutip ilaata taassuma akileraarutitut isigineqartariaqarnera pineqassaaq. Akileraarutit tunngaviummik inatsimmi § 43 naapertorlugu akilersinneqartarput, taamaammallu apeqqutip taamaattup qularutigineqarsinnaanera, akiliutip annertussusaanik inatsimmi aalajangiinikkut pinaveersimatissallugu naapertuunnerpaatut isigineqarpoq.

Sulianik ingerlatsinermi isigalugu nammineq eqqussuinermit atatillugu nassiusaanik annikitsunik nalikitsunilluunniit eqqussinissamik akuersissutinik qinnuteqaatit amerlassusaannik appaaniarnermut akiliut atorsinnaavoq aamma. Nassiusat amerlanerit pineqartillugit tamanna immikkoortumi sullissinermik nakkutilliinermillu annertunermit suliaqarnermik nassataqassaaq.

Nammineq piumassutsimik akitsuusiinermi akiliutip nalunaarutikkut pinissaa siunnersuutigineqarnerani, akiliutit assigiinngitsut atorineqarsinnaanerannik periarfissiuuaneq patsisaavoq. Assersuutigalugu tikittumut assersuutigalugu mamakujuttunik 1 kiilunik akitsuusiisussamut, tikittumullu allamut assersuutigalugu imigassamik kimittuumik 5 liiterimik, viinnimik 12 liiterimik cigaretinillu 1.000-inik assigiimmik akiliisitsinissaq naapertuutissanngilaq. Pisumi uani assigiimmik akiliisitsinermi tikittunut annikitsuinnarmik akitsuusiisussanut aaqqissuussinermik atuinissamik kajumikkunnaarsitsinissaq aarlerinaateqarpoq.

Nammineq piumassutsimik akitsuusiinermi akiliut, siuliani taaneqartutut Akileraartarnermik Aqutsisoqarfiup aaqqissuussinermik ingerlatsineranut matussusiisinnaavoq. Taakkununga massakkut naliliissutinik pigisaqartoqanngilaq. Aaqqissuussineq imminut sullinnertut aaqqissuunneqassaaq, tassani angalasut nammineerlutik immersuillutillu akitsuutinik akiliutinillu akiliisassapput, akiliisimanermullu uppernarsaammik Ilangaaserinermi Oqartussanut takutinneqarsinnaasumik tunineqartassallutik. Taamaammatt nammineq piumassutsimik akitsuusiinermut agguaqatigiissillugu akiliut 250 kr.-nit annikinnerunissaa ilimagineqarpoq.

Apeqquut 2

Siunnersuut aqputigalugu timmisartunut ilaasut nioqqutissanik nassataminnik akitsuusigassaataasunik nammineq piumassutsimik akitsuusiisitsinissamut periarfissinneqarput. Timmisartunut ilaasut nioqqutissat akitsuuteqanngitsumik nassarneqarsinnaasut tallimariaataat tikillugit nammineq piumassutsimik akitsuusertinneqartussanik nassataqarnissamut periarfissinneqarnissaat taamatut allannguinerikkut Naalakkersuisut kissaatigigaat ataatsimiititaliamit maluginiarneqarpoq. Siunertarinngikkaluarlugu anngiortumik eqqussuisoqarnissaa siunnersuutikkut pinngitsoortinniarneqarpoq. Tamatuma peqatigisaanik imigassamik atuinerup annertusiartornissaa pinngitsoortinniarlugu nammineq atugassanik eqqussinermi ilassutitut akitsuummik siuliani taaneqartumik Naalakkersuisut eqqussiutigalutik akitsuusigassaanngitsut tallimariaataannik eqqussinissamut periarfissiinerat imminut assortuussorinarsinnaasoq ataatsimiititaliaq isumaqarpoq.

Akissut

Angalasut tikinnerminnut atatillugu nammineerlutik nioqqutissamik akitsuusiisinnaanermut periarfissinneqarnerat, innuttaasullu nammineq atugassanik eqqussuisinnaanermik periarfissinneqarnerat annertuumik assigiinngissuteqartoq Naalakkersuisut maluginiarpaat. Taamaalilluni inatsisikkut nioqqutissat akitsuuteqanngitsumik eqqunneqarsinnaasut amerlanerulinnginnissaat eqqumaffigineqassaaq. Tamatuma saniatigut inatsit nioqqutissanik amerlanngitsunik, tikinnermi akitsuuserneqartussanik nassarsinnaanermik periarfissiivoq, ullumikkutut nioqqutissat arsaarinnissutigineqarlutik aserorterneqarlutillu akiliisitsiviusarnerat qimallugu.

Akitsuuteqanngitsut tallimariaataat tikillugit eqqussisinnaanermut siunnersuut, tikittut periarfissanik annertuumik qulakkeerinniffigineqarnissaannik, taamaaliornikkullu nunani allani malittarisassanut atuuttunut assingulersitsinermik kissaateqarnermeerpoq.

Naalakkersuisulli tupanik imigassanillu ullumikkut akuerisaasunit tallimariaammik amerlanerusunik eqqussisinnaanermut periarfissap, ullumikkumut sanilliullugu annertuseriarnerigaa ilisimavaat.

Tikinnermulli atatillugu billetinut il.il. aningaasartuutit matusserneqareertarput, taamaammallu imigassamik, tupanik il.il. eqqussinissap angalanermut siunertaaneranik eqqarsarneq tunngavissaqarpasinnigilaq. Nammineq atugassanik eqqussinermi pissutsit illuatungerluinnaanniipput.

Tulliullugu tikinnermut atatillugu imigassanik annertuunik eqqussiniarneq nalinginnaasunik ajornakusooruteqarpoq. Ajornakusoorutit taamaattut nammineq atugassanik eqqussinermi assinganik atuuttussaannngillat.

Allannguutissatut siunnersuummik tupat imigassallu annertussusaannik annikillisaasunik saqqummiussinissamik Ataatsimiititaliaq kissaateqassappat, tamanna Naalakkersuisut soorunami isummerfigissavaat.

Apeqquut 3

Aammalu imigassat nassarneqarsinnaasut tallimariaataannik nassarsinnaanissaq peqqinnissaq imigassarlu pillugit naalakkersuinikkut anguniagaqarnermut nukillaarsaataassannnginnersoq ataatsimiititaliamit apeqquuserneqarpoq.

Kiisalu nassarneqarsinnaasut tallimariaataannik nassarnissamut periarfissaq siunnersuummit peerneqarpat ukioq naallugu sulinerit qarasaasianilu aaqquissuussinerit aqquutigalugit allaffissornikkut kingunerisassat annertuut siunnersuummi taaneqartut pinngitsoortinneqarsinnaanersut paasissutissiissutigineqassasoq ataatsimiititaliamit kissaatigineqarpoq.

Akissut

Apeqquut 2-mut akissut innersuussutigineqarpoq. Tassunga atatillugu inatsisip nunatsinni imigassanik aalakoornartortalinnik tunisineq sunnissanngikkaa ilimagineqarpoq, tamatumanilu inatsisissatut siunnersuummik tusarniaanermi niuertarfiutillit tamanna pillugu akerliunermik saqqummiussinngillat.

Kajumissuseqarluni akitsuusiisarnerup nakkutigineqarnera, kajumissuseqarluni akitsuusigassat amerlassusaannik ikilisaanissamit killilimmik sunnerneqarnissaa naatsorsuutaavoq. IT-mik aaqquissuussanik ineriartortitsinermut aamma ingerlatsinermut aningaasartuutit aamma taamaassasut naatsorsuutaavoq. Taamaammat eqqussuinnissamut annertussutsinik annikillisaanermut atatillugu sipaarutaasinnaasut killilittut nalilerneqarput.

Apeqquut 4

Aammalu timmisartumut ilaasut nammineq piumassutsimik akitsuusigassanngortitsinnaanerat pisiniarfiit kaaviaartitaasa taakku amerlaqataannik annikillinerannik nassataqassannnginnersoq ataatsimiititaliamit apeqquuserneqarpoq.

Akissut

Inatsisissatut siunnersuummut nassuiaatini nalinginnaasuni immikkoortoq 4-mi saqqummiunneqartutut, niuertarfiutillit nammineq piumassutsimik akitsuutinik

*akiliisarnerup atulersinneqarneratigut immiaqqanit, viinninit, imigassanillu
kimittuunit kiisalu tupanit isertitaasa annikitsumik appariarnissaat
ilimagineqarpoq.*

*Appariaat eqqussuinerup annertuseriarnivianut naapertuutissanersoq
nalorninarpoq, nioqutissammi pissarsiariuminarnerunerat atuinerup
annertuseriarneranik kinguneqartarmat.*

Inussiarnersumik inuulluaqqusillunga



Erik Jensen